

修行道地經卷第八

明八

西晉三藏法師護譯

弟子三品修行品第二十八

巍巍佛德尊 威神不可量 道法隨時化

度脫諸十方 觀見生死瑕 爲現法橋梁

毀訾終始苦 嗟嘆于泥洹 分別弟子快

而順示厥行 稍稍而開導 乃至于大安

若有修行見終始患地獄之毒畜生之惱餓

鬼之苦人中憂憤天上無常不可堪矣展轉

周旋譬如車輪生老病死飢渴寒暑恩愛之

永樂北藏

修行道地經

第一二八册

別怨咎集會愁惻之痛巨具說言從累劫來
與父母違兄弟離闊妻子之乖涕泣流淚超
于四海飲親之乳喻于五江四瀆之流或父
哭子或子哭父或兄哭弟或弟哭兄或夫哭
妻或妻哭夫顛倒上下不可稱記動勤苦根
愚癡之元修行見然皆患厭之但欲免斯生
死之病晝夜精進不捨道義求於無爲自見
宿命從無量劫往返生死設積身骨過須彌
山其髓塗地可遍天下三千世界計死若周
其血流墮多於古今天下普雨修行自察如

是之厄千萬劫說猶不可竟故棄捨家除髮
去鬚專精求道不慕世榮若如明者不貪屍
形於是頌曰

修行見終始 地獄之苦惱 畜生餓鬼厄

天下世間別 生死之展轉 譬如千車輪

父子兄弟乖 妻息子離感 涕哭淚流下

超于四海水 飲親之乳種 踰於五江河

修行故捨家 專精爲道法 不慕時俗榮

如明者捨毒

修行自念我身惑來不可稱限不自覺知合

會離別憂鬱之痛譬如劇醉不可了之枉說
趣語自爲審諦恩愛之著譬如膠漆不能自
濟則行精進遠俗近道譬如有人遠遊他國
賈作求利至彼未久興大疾病死亡者衆十
不遺一死屍狼藉臭處叵言旣無良醫又無
好藥可以療之其人恐怖悔詣彼國設不來
者不遭此難夙夜反側愁不可言設我病瘳
一還本國無有還時其人適遇得一大醫飲
藥鍼灸疾稍稍愈氣力強健即返本土與家
相見自陳值厄困不可言從今以後終不敢

行不至彼土一衣一食何所求耶唯欲自寧
安知餘人也復念若聞彼土之名戰慄惶悚
不欲出舍而守其身弟子如是見五道苦姪
怒癡病生死無息夙夜專精坐禪念道得世
尊教咨嗟泥洹毀訾終始是爲良醫飲之好
藥疾則除者謂佛法經去三毒也死屍狼藉
謂五陰六衰悔至其國者自惟念言從累劫
來周旋生死恩愛之著猶心多端不見苦諦
習盡道諦以得道證畏苦厭身卑般泥洹不
能還教固在然熾須佛世尊示本無一乃當

進前得不退轉進却自由於是頌曰

譬如有人遠行賈 至於彼國遭疾病
衆人死亡十遺一 死屍狼藉無藏者
心自悔恨至其國 吾何不遇值此殃
則得良醫療其疾 便還本土難復行
畏生死患亦如是 明八 觀於五道周旋苦 三
自責本咎不覺道 終始辛苦其憂惱
一心精進求泥洹 欲度世間諸怖驚
惡終始困猶死屍 專志而向無爲城
修行恐懼或當命盡不得度脫還歸三塗難

得拔出不當懈怠計有吾我如世凡人與三
寶乖窻窻冥冥譬如昔者有衆賈人遠行治
生更歷曠野無人之處行道疲極便眠睡卧
亦不待時弗嚴兵仗大賊卒至而無覺者不
施弓矢爲賊所害中有力者便走得脫飢困
歸家更復設計求強猛伴復順故道行賈求
利每冥息寐待時行夜嚴正弓箭賊見如是
不敢前格知之難當便自退去窻窻冥冥者
謂爲癡網因癡致行而生識著名色六入更
樂痛愛受有生老病死愁憂啼哭痛不可意

行治生者謂修行也疲極卧寐者謂不時了
非常苦空非身也無行夜者謂不思惟深經
之義也兵仗不嚴不遵大慈大悲之慧趣欲
自救不念衆生賊來見危謂坐禪思不入空
淨而爲五陰六衰所迷墮四顛倒非常謂常
苦謂有樂非身謂有身空謂有實命盡生天
福賜還世不離三塗強者力走得脫歸家謂
得羅漢也即求強伴更治生者謂至泥洹知
羅漢根不至究竟見佛受教更發大意为菩
薩也與衆爲伴相隨行者謂六度無極諸等

行也。兵仗嚴正待時行。夜謂大慈大悲分別
空行不著不斷也。賊早還者謂不起法忍無
量礙悲觀三界空不畏生死一切四魔皆爲
之伏也。於是頌曰

修行恐命盡 或入三惡道 不復計吾我

歸命於三寶 猶昔有惡人 遠行求財利

雖眠而卧寐 爲惡賊所害 中有強健者

盡力走得脫 歸家說遭厄 今乃得安耳

以得羅浮道 乃自知爲限 不能入生死

以泥洹爲礙 更合強拙伴 嚴兵時行夜

賊見不敢前 便退歸本土 在於無爲界
知泥洹爲限 則發菩薩意 行大慈大悲
分別深空行 不著無所斷 周旋度生死
無有三界難

修行奉法入四等心無大慈悲譬如小龍能
雨一縣而不周遍雖爲人民潤不足言羅漢
行道四等如是若如海龍普雨天下無所不
潤菩薩大人大慈大悲普及衆生無所不濟
佛天中天見心如是便爲現限莫踰泥洹稍
稍進之至于大道知本迷惑喻有一人而有

三子父少小養至令長大衣食醫藥未曾令
乏父轉年長氣力衰微謂諸子言汝輩不孝
生長活汝使成爲人吾既年老不欲供養報
乳育恩反逼我身求財衣食何緣爾乎當告
縣官治殺汝等子聞父教即懷恐怖歸命於
父我輩兄弟愚癡所致不識義理不顧父母
恩養之德愛重望深不自察非今聞嚴教即
當奉命遵修孝道超凡他人夙夜匪懈無辱
我先時彼諸子各行治生入海採珍得諸七
寶供給父母至孝巍巍唯念二親不自顧身

獲大光珠名曰照明即往奉父父見明珠頭
白更黑齒落更生爲大長者遠近歸仰是謂
父慈子則爲孝也爲弟子行無有大慈父有
三子者謂心意識也養長子者謂姪怒癡著
於三界也衣食之者謂五陰六衰十二緣縛
也子長續求供養者謂諸情欲不知厭足也
父恐欲誥縣官告者謂覺非常欲斷六入子
受其教奉行孝道者謂歸命佛三子更孝順
者布施奉戒智慧之元也入海得七寶者至
七覺意成羅漢道也遂至孝者知弟子限至

泥洹界更發大意为菩薩道得照明珠父更
少者現在定意見十方佛無所罣礙也於是
頌曰

昔者有一人	而生有三子	養育令長大
故求父衣食	父告於三子	吾又年老極
汝當供養父	既大索吾力	告言汝向官
棒笞以五毒	子聞父之命	則奉行孝道
入海求七寶	供奉子尊父	又得照明珠
父則更年少	三子心意識	情欲不知足
父訶更孝順	謂施戒道慧	遵於七覺意

成羅漢泥洹 受佛大深教 更發菩薩心
道德甚巍巍 覩見十方佛 不礙四大身
猶空無所拘

譬如昔者而有一鼈從海出遊至於岸邊有
一大狐追之欲危其命鼈覺狐來藏頭四足
覆於甲下狐住待之設出頭足我當搏食鼈
急不動狐極捨去鼈還詣於大神龍王說其
本末求爲龍身乃無所畏能制五陰不爲魔
燒得泥洹道得爲龍者入菩薩道不畏四魔
救濟衆生於是頌曰

永樂北藏

修行道地經

第一二八冊

如龍蛇頭尾 不畏羅漢然 得飛為龍神
菩薩亦如是

譬如有人遠行求財涉於寒暑謂得大利或
處遇賊亡失其業又有明人自於本土造方
便計利入無量供給四方利功累德計無常
苦空非身觀外萬物成敗之事或得禪定成
羅漢道更從發意求為菩薩或有達者知四
大空無有內外行大慈悲加哀十方雖有所
求皆空無遺無遺之解慧為上得平等覺
若未來今若如虛空於是頌曰

如人遠買作 弟子亦如是 積功觀惡露
察萬物非常 菩薩如明人 求利不遠遊
無生死泥洹 得成平等覺

其修行者恐畏生死惡三畏難畏苦厭身不
了本無趣欲越患不念眾生譬如軍壞諸龍
劣人唯欲自救明八不濟危厄有此心者佛則為
說除三毒之惱泥洹為快離冥就明譬如導
師將大賈人遠涉道路於大曠野斷無水草
賈人呼嗟謂塗悠悠安能所至永為窮矣時
彼導師聰明博學亦有道術知為賈人心之

所念厭患涉路則於中道化作一國城邑人民土地豐樂五穀平賤賈人大喜轉共議言一何快乎本謂彌久何時脫難到于人間適有此念便至此城當復何懼時衆賈人便住彼土快相娛樂飲食自恣從意休息心如欲厭城郭則沒不見國土賈人皆怪何故如此也導師答曰卿等患厭謂道懸曠永無達矣吾故化城國土人民使得休息見汝厭之故則沒之佛言如是弟子之行畏終始苦謂生死惱懼三界患早欲滅度故爲示之羅漢易

得誘進使前度於生死而盡三垢得無爲道自以爲達成就具足臨滅度時佛則住前現于大道是未爲通發無上正真之道也得無所從生法忍至一切智乃爲達耳譬如國遭於三厄何等爲三一曰盜賊二曰穀貴三曰疾病衆人流散走到他國久後國安或有往還者或有恐怖三難之患永不可反佛言國者謂三界也遭三厄者謂三毒垢也捨諸他國謂羅漢也國安還者謂菩薩以得無所從生法忍一切深慧還入三界度一切也遭

於三厄而不還者羅漢以得無爲懼三難處而不能還度脫衆生也於是頌曰

譬如衆賈人行於大曠野疲極恐不達

導師化城郭衆人住休息安止有日月

知其心厭已便沒不復現佛世尊如是

見畏生死難明八便爲現無爲使度三界苦

臨般泥洹時爲示大道化令還無從生

廣濟於一切又譬如大國卒遭三厄患

各散詣他國國安還不還畏生死之難

是謂爲弟子還國不以恐菩薩化十方

權慧方便化皆令得其所譬如大船師

往反無休息佛世尊如是法身無往反

周旋於一切如日光普現

緣覺品第二十九

其從緣覺而不自了既發無上正真道不與

善友而受眞法專自反行假使奉教六度無

極而皆有想欲得尊號三十二相八十種好

威神尊重不了善權佛現色身反謂有身便

隨緣覺如有男子欲見大海遊到陂池及泉

江河於彼求寶而獲水精小明月珠自以還

得金剛尊光從菩薩心而還退者不曉如來
無出入法空而無形道無三世去來今也而
謂見空以爲定矣而不了知適空之行適度
量不能進前上不及佛復有弟子中道而
止譬如有人欲見天帝而覩邊王則謂是帝
欲學正覺意有齊限不解深慧還墮緣覺亦
如是也若有斯心佛便導示緣覺之法譬如
長者年又老極其子衆多有大殿舍柱久故
腐中心火興諸子放逸淫於五樂不覺此炎
父時念言此舍久故柱心火然轉恐柱摧壞

殿鎮之當奈之何欲作方便誘化使出舍勉
火難父則於外作諸妓樂使人呼諸子各當
賜汝象馬車乘摩尼之珠諸子遙聞妓樂之
聲又被父命悉馳出舍往詣父所父則各賜
諸子寶車好乘等而不偏諸子白曰向者尊
父呼我等出各賜異珍今者何故所賜一等
長者告曰吾殿久故柱中心腐而内生火吾
恐柱摧鎮殺汝等故作妓樂呼汝輩出吾心
乃安皆是我子等愛念之故悉與之珍寶車
乘佛言其故殿舍謂三界也柱腐欲壞者謂

三毒之患周旋生死柱內火然謂衆想念也
尊者謂如來也諸子放逸謂著三界欲也作
妓樂者謂佛說罪福呼諸子出各賜與者現
三道教也諸子悉出父等與寶者爲現大乘
無有三道臨滅度時乃了之耳於是頌曰

譬如有長者 諸子甚衆多 五樂自迷惑
著於故殿舍 柱腐而欲壞 中心而生火
父恐殿舍崩 鎮殺其諸子 因作衆妓樂
出子等當賜 佛世尊如是 從緣覺意成
臨滅度之時 佛則往其前 爲現一法教

大乘等無異

修行發意欲求大道不了本無著佛色身三
十二相八十種好人中之尊譬如有人聞四
方帝號轉輪王主四天下而有七寶諸子千
人力皆勇猛城廣且長東西四百有八十里
南北二百八十里也中有大殿方四十里四
寶牀座人民熾盛五穀豐熟快樂無極妓樂
之音有十二部夫人嫫女八萬四千諸國治
王八萬四千象馬車乘其數亦然王有四德
何謂四德長者梵志凡庶小民皆敬聖帝如

子奉父王愛念之猶母哀子王所教化則受奉行遠近歸命如人仰天依地得活復有四德無寒無熱初不飢渴生未曾病本祐所致其人聞之欲往見帝慕其聖教便發進行於道疲勞見一異道則順入中覩一大城人民熾盛樹木流水樂不可言謂是城郭爲聖帝邦便止其上又斯雖樂鬼神之處其人不覺也時有天王名曰休息即覩其人爲解說之此非聖帝處也是鬼神國也轉輪聖王威德巍巍爾乃欣然親近奉從若有發意學菩薩

道不了深義不分別空世間無佛出入閑居處於樹下觀察萬物非常苦空身不久立不解本無以得緣覺自以爲成臨般泥洹佛在前住爲現大法深妙之教十二因緣本無有根也曉本末空無去來今大慈大悲不見三界無泥洹想乃成正真度脫一切也於是頌曰

譬如有人求聖王 反見一城謂是邦
諸小國王憶轉輪 在中娛樂謂大通
休息天王往見之 則爲解說此鬼土

非爲大帝轉輪王 爾乃驚怖自知非
便發往詣大帝邦 見威神德大巍巍
吾冥不解久迷惑 則奉聖王常侍從
欲學大道不了了 還墮緣覺亦如是
然後受佛深妙行 乃至無上正真道

光光佛威德 其德濟衆生 等心加一切
除三毒之名 永脫生死苦 道因智慧成
清淨如日光 徹照三界冥

菩薩品第三十

其修行者因自思惟人在生死譬如車輪反

覆上下而不離地終始若斯往反之患不離
三界皆是本癡不了本無謂有四大倚之爲
諦譬如有人見師幻化而謂是人不知化成
愚人如是貪著吾我計有身命不曉其體地
水火風譬如有人遠出欲遊行詣他國素聞
道難常懷懼心畏於盜賊四向望候遙見諸
塢衆石草木謂有大賊數千百騎當奈之何
各走馳散不知所湊中有導師呼語衆人勿
得便捨至劇難處而無水漿或值窮厄不濟
身命或困乏極爾乃來還往反既久加疲

勞悉失財物當何依怙裸匱飢凍反當求恃
而從豪富歸命舉假且自安心共相率化遣
人探候設無賊者徑可進前假使有來堅志
共戰當令走壞所以者何一人欲死十人不
當十人欲死百人不當百人欲死千人不當
千人欲死萬人不當萬人欲死天下縱橫衆
人受教不復馳散皆住嚴待遣人探竊唯見
草木瓦石之屬永無盜賊衆人欣歡爾乃進
前皆謂導師天下無雙智慧明達誠非世有
舉動進止輒從其命不敢違失菩薩大人修

行如是爲一切導解三界空一切如化五陰
猶幻不得生死而滅其身開化十方爲示正
路嗟嘆菩薩深遠無侶周旋三界度脫生死
弟子旣小志常懷懼趣欲滅身不及一切又
不究竟當復還退從發意始明人因此聞菩
薩教皆發無上正真道意也於是頌曰
菩薩大士爲修行 了一切空身如化
因緣合成得是體 坐心不正追逐邪
譬如賈人遠遊行 遙見樹木謂是賊
心各懷懼而馳散 導師解之心乃安

菩薩如是解本無 爲一切師廣說法
示弟子等大道深 如日光出無浮雲

菩薩學道稍稍漸前至無極慧因六度無極
分別空行積功累德無央數劫乃得佛道譬
如有人少小士進始爲國貧轉得大富求爲

明八

十三

丞尉遂成令長進二千石稍到州牧四正公
卿大臣轉至帝王轉輪聖王天帝梵尊爲菩
薩道次第學者亦譬如稍稍發意布施持
戒忍辱精進一心智慧縛制六情除去三毒
除衰之蓋向空無相無願之法至不退轉近

成具事一生補處猶如磨鏡洗治平鐵稍稍
令細遂復發明稍稍習行六度無極積功累
德不可計劫自致得佛開度十方於是頌曰
如人少士進 至尉乃令長 二千石州牧
四正至公卿 大王并轉輪 日月天帝釋
菩薩亦如是 稍稍積功德 奉六度無極
行足得至佛 開化十方人 悉令至大安
菩薩學定專精一心稍去衆垢進化其志譬
如有人欲行入海日月行前而往不退雖遭
飢寒未曾動移不計遠近勤勞之厄行不休

息遂至海邊合人上船入海採寶雖知三難
不以爲劇到大龍王所居之宮從求如意上
妙明珠欲給窮乏龍王與之言施一切勿得
愛惜衆人蒙光而不耗滅其人得珠蒙恩忽
還以至一國無不得安菩薩如是等心行道
欲濟衆生慈悲喜護一心念佛其所在方專
精向之未嘗懈廢七日十日三月一載不爲
俗想一心向佛并化衆生乘摩訶衍無極之
教見十方佛受教得定三昧不動爲一切講
譬如從龍王得如意珠廣及衆人譬如有人

永樂北藏

修行道地經

而聞天上有好玉女端正姝好意欲往見無
有神足夙夜思想卧起不忘積有年歲未嘗
他念便於夢中得往見之坐起進止菩薩如
是一心思惟向某方佛積年不息得三昧定
行不爲懈累劫不厭自致得佛菩薩行道大
慈大悲哀加一切昔有一人其目不明不見
日光心中憂悵雖有日明我眼盲冥而不能
親當奈之何求得神師飲之甘露內病即除
其眼精微得覩日光察八方上下及諸人民
初發大意六入五陰三毒未除不能得見十

方諸佛從成就菩薩受法深教行四等心解
三界空便得三昧見十方佛從定意起救濟
衆生譬如珍寶著水精上如以其器受於瑠
璃瑠璃之色令器同像菩薩如是一心念佛
無有他志即得定意見十方佛因佛威神本
德所致見佛世尊於是頌曰

譬如有人行入海 未曾解厭乃至耳
合人乘船至龍王 從求大寶如意珠
以施一切莫不蒙 菩薩如是行四恩
大慈大悲行大道 一心精進三昧門

如人聞天有玉女 夙夜思想夢得見
菩薩如是等精進 見十方佛無不遍
又如目冥思日光 良醫治之眼即明
菩薩如是專向佛 未曾休息不退轉
如以珍寶著水精 辰相光耀無不照
菩薩如是三昧定 從佛受教遍教化
菩薩積功累德欲度一切視之如父視之如
母視之如子視之如身等而無異爲五道人
勤苦無量不以爲劇雖歷五道生死之患地
獄之苦餓鬼之毒畜生之惱天上世間終始

之厄心不迴動行大慈悲四思無厭救濟十方免衆想念譬如彼月初生之時若小羊角日月稍大遂至成滿光明普照衆星獨耀次第學道爲菩薩法布施持戒忍辱精進一心智慧經無數劫勤苦之行身心相應言行相副念十方人如若父母無有親踈譬如種樹稍稍生芽後生莖節枝葉華實漸行如是從初發意便喜向佛以獲悅心休息惡道成就六度無極之法入善方便不起法忍一切佛慧則轉法輪示現滅度分布大法後生蒙恩

猶如有人欲立大屋先平其地漸興根基稍壘其牆令至高大以材木覆梁柱牢堅以瓦蓋之塗治仰泥作悉成了而墜灑之白壁赤柱儼然巍巍然後請會親族門室善友鄉黨無不周遍飲食作樂無不欣歡菩薩如是積行無量不以勤苦而有厭懈觀彼衆生展轉五道終始周旋如磨不定發大慈悲無蓋之慧欲救一切猶若如空無所不覆道德已成現處三界示於色身三十二相八十種好令衆見悅爲十方人而師子吼一切聞聲莫不

歸伏各從本心成三業行於是頌曰

初發意菩薩 慈念諸十方 如父母子身

等心無希望 漸漸發行跡 如樹芽至莖

枝葉節華實 積者功不唐 菩薩亦如是

稍稍奉行道 功德已成滿 平等最吉祥

四八

猶若起大屋 平地始基墻 壘之令高大

十六

覆蓋正圓方 請會親鄉黨 飲食作樂倡

菩薩救衆生 度脫以道光

何謂超行適發道意至不退轉無所從生具

足成就至阿惟顏俱行菩薩何緣獨爾解三

界空五陰無處四諦無根緣想而生十二之
因以癡爲元觀察癡元亦無處所有所著求
則名之癡慧者了無譬如幻師還觀化人不
見有人菩薩如是省三處空猶如野馬夢幻
芭蕉深山之響但可有名而不可見昔有一
人自於夢中見有國中多諸人民王大嚴急
羣臣奉事不敢失意五穀平賤衣被絳色倡
伎娛樂其人觀之驚然爲觀往見國王王便
立之以爲大臣賜與官職僕從田宅七寶踊
躍無量又自見身復入地獄餓鬼之中化爲

驢身在於輩中鳴忽然上天七寶宮殿王女
相娛從夢便覺不覩所獲則自解了五道如
夢一切本無而不可得分別此慧則不退轉
至無處所權慧具足明學大道觀心如幻五
陰六入若如羣臣色聲香味細滑之法五道
所有皆如彼人明八所夢覺也見無所見亦無夢
想是謂超越至無極慧不緣次第於是頌曰
人身及五陰 觀之無處所 四諦十二緣
一切悉如化 如其夜夢見 一國大快樂
爲王作大臣 伎樂而豪富 入地獄餓鬼

爲驢輩中鳴 天上七寶殿 相娛寤不見
慧者觀三界 五陰悉如夢 以了無處所
還得不起忍 道法無遠近 猶空無所處
心空解本無 忽如日大光 當爾時之慧
無得無所失 道無去來今 覺乃本無一
何謂超行人本一故用不解之便起吾我適
著便縛以縛求脫不著無縛何誰求脫譬如
五事而住虛空雲霧塵烟灰不能爲彼虛空
作垢心本如空五陰之毒喻如五事不蔽心
本曉了無形慧無罣礙入深法忍不以次第

譬如有人曾爲凡人家既困乏行詣佛所逐
檀越食發一好心我身宿罪不能布施今得
貧厄衣不蔽形食不充口又不作福因佛求
食我設有財廣施供佛及諸聖衆給足窮乏
爾時世尊及與聖衆各自罷去乞士自責吾
本薄祐不能興德獲斯困匱思惟是已卧蔭
樹下日已著中餘蔭皆移所卧樹下其影不
轉體諸垢全悉爲除去自然有威時國王崩
當得賢人以爲君主募一國中無不周遍獨
見乞士有超異德樹蔭覆之若如大蓋往啓

羣臣詠其威德人民咸喜嚴駕奉迎立爲國
王已得帝王普興德化供佛衆聖人在生死
五道之苦五陰六入十二因緣聞佛深法本
無之慧大慈大悲加於一切雖欲度人不見
有人度無所度不見吾我三界如響一切無
求等猶如虛空則超入慧不退轉法無所從
生阿惟顏事名之有德亦無所獲譬如日出
衆冥皆索還成平等無所適莫不見有縛亦
無所脫譬如金山自然無作曉求金者輒如
得之不以爲難人本清淨而無垢穢學了此

慧便入道門而無罣礙猶空自淨無有淨者
於是頌曰

如人久困貧 乞食從眾聖 便自還剋責

吾宿積罪冥 便發恭敬意 慈念于眾生

若得為帝王 給施於萬姓 則卧於樹下

其影蔭彼形 使者啓羣臣 悉往而奉迎

立之為國王 事佛及眾聖 菩薩亦如是

超越解本淨 德高為巍巍 度脫諸羣生

五事不汚空 心淨如寶英 救濟五道厄

使除終始驚 如月十五日 星中而獨明

昔有一人欲往見佛知為云何身形何像所
說何趣阿難遙見前白佛言此遠來者為是
何人佛言阿難未曾有人其人徑前欲得視
佛而不見之佛身忽然永不在座人自思惟
故來觀佛而不見之察念何謂便自解了世
尊法身本無有形用吾我人而現此身譬如
深山人呼響應因對有聲法身無處何緣欲
見適見此已便逮無所從生阿惟顏了無內
外普等若空超入正覺於是頌曰
昔有人發意 欲見佛世尊 其尊何等類

說法義云何 阿難問何人 佛言未曾有
尊身忽不現 怪之何所湊 便自解了慧
佛身無所遊 空體慧住道 示現無不周
道法如響應 等心無怨讎 解義若斯者
如空莫不覆

發意菩薩欲救一切觀四大身因緣合成若
如幻化譬如假物則非我所有亦非他人猶
如合材機關木人因對動搖愚者觀之謂爲
是人慧明察之合本無人一切三界皆空如
是色痛想行識十二因本無有往反若水中

影無有形名如是行者起入法城於是頌曰
初發意菩薩 解四大本空 視生死泥洹
一切觀皆同 譬如借他物 當還所取供
不計吾我人 除去語矇矇 不見心意識
道明越海江 三界如幻化 菩薩受誰誦
五道猶野馬 衆惡悉佛種 勸化諸未解
法身不轉動
或有慧人自然發意如來之行不因言說而
至正覺如日大光一時普遍解空義者無道
欲觀等如虛寂永不可名譬如曠野汚泥之

中無有下種自然有生青蓮芙蓉莖華菩薩
如是在恩愛中三界之難忽然慧解不見生
死不住泥洹教化一切令至大安於是頌曰

於是發意爲菩薩 分別空義解本末
以入道法無所乏 智慧具足神通達

猶如蓮華生淤泥 明八 發如來意成怛薩

開化一切衆生類 等住法門爲正覺

華生泥中清淨好 四種之色喻四等

超越次第阿惟顏 勇猛力休首楞嚴

菩薩修道譬如飛鳥飛行空中無所觸礙以

空爲地不畏虛空菩薩如是發意之頃便入
道慧善權方便不以爲之心等如空無所住
止不難生死不樂泥洹俱不增減譬如五種
綵色各異皆因草木草本根生悉因從地地
下有水水下有風風因空立如是計本悉無
所有若如浮雲忽有氣來況無所至菩薩如
是解三界空喻之如風無所住止計有吾我
便有三處不計有我安計有彼不明無冥無
淨不淨便入本無亦無出入譬如昔者有一
小蟲心懷金剛住於海邊閭浮大樹高四千

里樹則戰動不能自安樹神問之卿何故震動不安樹報之曰蟲住我上所以不安神又問曰金翅大鳥立於仁上何故不動小蟲處上而獨戰慄樹報之曰此蟲雖小腹懷金剛吾不能勝是故動搖其小蟲者謂發意菩薩也其大樹者謂三界也樹動不安者謂發菩薩超至深慧達阿惟顏三千大千世界爲六反震動其金翅鳥住上不搖謂諸弟子四道雖成無所能感也於是頌曰

譬如小鳥住大樹 戰慄不安五支散

菩薩大士亦如是 超行成就動三千
其心堅固如金剛 度脫一切生死患
弟子猶如金翅鳥 處在三界無所感
菩薩解慧入深微妙不從次第猶如有人卒
立爲帝凡夫之士曉了本無心等如空而無
處所至阿惟顏昔者虛空忽有藥樹枝葉普
覆八嶠上下其氣照下諸毒草木惡氣悉除
長育天下諸有好人大小悉安地高爲平卑
者則高天下太平無有溪谷及與山陵七寶
自然雨墮甘露人民大小莫不以歡吾本有

福以離衆患出行步無所畏難無有惡獸盜賊之苦藥樹自然蒙者皆安風雨時節五穀豐熟面色和悅衣食化至無有衆惱猶如大樹忽然生空普照天下若有凡夫在生死中卒解深慧至真本無而無罣礙普照天下者謂彼菩薩放大光明以成爲佛除一切人姪怒癡垢也長育令安謂使四輩奉行道義也令高下平者使五道人皆獲平等慧七寶自然者謂七覺意也雨甘露者謂講菩薩法也人民安隱五穀豐滋謂終始斷逮五神通

遂至大義阿惟顏住於是頌曰

如人卒立爲國王 菩薩大士亦如是
曉了深慧至無極 得成佛道度十方
猶如虛空生大樹 根株枝葉四分布
照於八隅上下方 地高下平五穀滋
人在生死凡夫身 忽解深法慧流布
令十方人度三塗 等心一切雨甘露
修行道地經卷第八

罽賓文士竺侯征若性純厚樂道歸尊好學不倦真爲上儒也贊此經本來至燉煌

是時月支菩薩沙門法護德素智所覽
若淵忘化末進誨人以真寃天竺語又暢
晉言於此相值共演之其筆受者菩薩弟
子沙門法乘月氏法寶賢者李應榮承索
烏子剌遲時通武支晉支晉寶等三十餘
人咸共勸助以太康五年二月二十三日
始訖正書寫者榮携業侯無英也其經上
下二十七品分爲六卷向六萬言於是衆
賢各各布置

音釋

壘

魯根切
壘也 隅齊愚
厓也

明人

釋三